



Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.61







Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.61



Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.61



Early European Books, Copyright © 2011 ProQuest LLC.
Images reproduced by courtesy of the Biblioteca Nazionale Centrale di
Firenze.
CFMAGL. 1.6.61



1.6.61

CASPARI BARTHOLINI
THOM. F.

ORATIO JUBILÆA

De

Gestis Anni LXXVII
Prioris & currentis Seculi,

AD

AUGUSTISSIMUM DANO-
RUM MONARCHAM
CHRISTIANUM
QVINTUM.



HAFNIÆ, Typis VIDUÆ Georg. Gødiani Reg. & Acad. Typ.
PROSTAT apud PETRUM HAUBOLD. Acad. Bibl.
ANNO MDCLXXVII

1.6.61

Ostendit in hac oratione honoratissimus Dn. Collega locuples ingenium, eruditionem variam, sed præsertim in Patriam, Patriæq; Patrem, & Augustum ejus avum, pietatem. Dab. Hafniæ 26. Nov. Anni 1677.

OLAUS BORRICHIVS.

AUGUSTISSIME REX,

DOMINE CLEMENTISSIME,

Non gloriosius cala-
mum, publica autho-
ritate provocatum,
occupare potui, quàm
in Regis mei laudes & rerum
hoc anno fortiter gestarum
commemorationem. Auspica-
tò mihi jam primum in patriam
gressus referenti, injunctæ sunt
dicendi partes ut Acta Anni
hujus secularis in Ecclesia, ex
more Academiæ nostræ, ora-
tione Jubilæa solenniter pro-
sequerer. Commoda usus oc-
casio-

A 2

casio-

casione, ab Augusto nostro felicititer perpetrata silentio involvere nec volui, nec debui. Hic prioris seculi Annus nativitate Divi *Christiani Quarti* nobilitatur. Idem præsens seculi, masculæ fortitudinis Tuæ, *Christiane Quinte*, monumentis inclarescit, qui tot hostilia arma detracta victis, tot parta bello spolia ostendit. Fortunæ Tuæ adscribimus felicem ab expeditione nupera reditum inter tantas maris impetuosas minas & tot pericula tempestatum. Læti Te omnes saluum
aspi-

aspicimus. Deus Te servet
porrò. Felicitas Tua dat no-
bis salutem & civicam mere-
tur. Nullum ornamentum
Principis fastigio dignius pul-
chriusque est, quam illa coro-
na: *ob cives servatos*. Pro Te nos
stabimus, pro Te pugnabimus,
pro Te uno tot legiones in aci-
em deducuntur, & adversa
vulneribus pectora ferent, ne
Imperatoris sui signa vertan-
tur.

Tu vinculum es, *Auguste*,
per quod omnes cohæremus,
Tu spiritus vitalis, quem tot
mil.

millia trahunt. Omnibus nunc
civibus Tuis & hæc confessio
exprimitur, esse felices, & illa,
nihil jam his accedere bonis
posse, nisi ut perpetua sint.

Scripsi Hafniæ Cal,
Decembr. 1677.

MAJESTATI TUÆ

SUBJECTISSIMUS

CASP. BARTHOLINUS
TH. F.

RE-

RECTOR
REGIÆ ACADEMIÆ HAFNIENSIS
D. WILHELMUS WORM
MEDIC. ET PHYSIC. P.P.

CUM PATRIBUS ACADEMIÆ CONSCRIPTIS
QVOD FELIX FAUSTUMQVE SIT

AUCTORITATE
ILLUSTRISSIMI ET EXCELLENTIS-
SIMI HEROIS

DN. FRIDERICI COMITIS

AB AHLEFELD

MAGNI REGIS CANCELLARII ET ACAD.
PATRONI OPTIMI, &c..

LABENTEM ANTEACTI SECVLI ANNUM
FELICI SIDERE RENASCENTEM

ORATIONE JUBILÆA

PER

CASPARVM BARTHOLINVM

THOM. FIL.

MED. ET ANATOM. P.P.

EA DICENDI FACULTATE

QVAM

VEL VIRES ORATORIS NOVI

VEL RECENTES PEREGRINATIONVM MOLESTIÆ FERVNT

PVB

PUBLICE SOLENNITERQVE CELEBRATURUS

UT SECULARI HOC ANNO

QVÆ

VEL EODEM SECULI PRIORIS IN ECCLESIA ACTA
VEL HOC SECULI PRÆSENTIS IN PATRIA NOSTRA

SUB AUSPICIIS AUGUSTI NOSTRI

FELICITER PERPETRATA SUNT

BREVITER EXPONANTUR

OMNES OMNIUM ORDINUM AUDITORES

QVOTQVOT LITERIS FAVENT ET LINGVIS

CIVES ET HOSPITES

QVI

RELIGIONIS DIVERSÆ TURBAS APUD EXTEROS

UNIUS IN PATRIA TRANQVILLITATEM AUDIRE

ET

IN ILLUSTRISSIMUM ORATIONIS COMPLEMENTUM

AUGUSTISSIMI MONARCHÆ

CHRISTIANI V.

PATRIS PATRIÆ VICTORIOSI

TRIUMPHOS PRÆSENTI ANNO ACTOS

CUM ORATORE

LAUDARE AVENT MIRARI STUPESCERE

IN AUDITORIUM SUPERIUS

CRASTINI DIEI HORA XII. MERIDIANA

QVANTO POTEST OPERE INVITAT.

HAFNIÆ DIE XXX. OCTOBR. dñs lñc. LXXVII.

SUB OFFICII NOSTRI SIGILLO.

CA-

V- I
CASPARI BARTHOLINI
THOM. F. CASP. NEP.
ORATIO JUBILÆA

*In Acad. Reg. Hafniensi publicè dicta
Prid. Cal. Novembr. 1677.*

Immortali Deo vota
supplicia exsolvo, quod
finita bonis avibus pere-
grinatione, ex publico hoc loco
in præsentī verba facere, Patrum
Academiæ Conscriptorum volun-
tate sit concessum. Enimvero non
facile se aliud tempus commodius
aperire mihi potuit, quo de felici-
ter peracto itinere Deo individuo
comiti gratias ex merito agerem,
& de temporum horum felicitate,
B in

2 CASP. BARTHOLINI

in quæ incidi redux, publico mihi-
que gratularer. Duxit me Deus
per viarum difficultates, per aspera
montium, Alpium juga, etiam An-
nibali formidanda, per sylvas Her-
cinias, per varia denique vada, pe-
riculo suo viatoribus invisa, & quæ
Divinæ Majestatis benignitas fuit,
salvum ubique perduxit & incolu-
mem. Non quidem Ulyssis an-
nos in peregrinatione æqvavi, sed
circumspecta providentia paucio-
res absolvi, non prorsus steriles.
Sirenum cantus audiui, sed aures
non præbui. Tempora ita di-
stinxi, ne sine fructu transvolarent,
& semper istum cum istis calculum
posui, quem solent sapientes, pre-
tio.

ORATIO JUBILÆA. 3

tiosissimarum rerum æstimatores. Peregrinatus sum ita, ut mens tamen semper esset domi suæ, alienarum artium scientiarumque ita appetens, ut meas non negligerem, Patriæ aliquando profuturas. Doctorum favores expertus sum, Principum gratiam & munificentiam, omnium amorem, à quibus ægerri-
mè divulsus spem redeundi promisi. Nusquam verba mea periculosa fuerunt, etiam ubi tutæ vix sunt nostrorum cogitationes, velut inter domesticos familiaresque oberrabant. Vidi Belgium liberum, Galliam officiosam, Italiam florentem, Germaniam masculam, nusquam patriam extra patriam.

B 2

Qvan-

4 CASP. BARTHOLINI

Qvanqvam enim omnia officio-
rum genera expertus sim, ingrata
tamen videbantur, qvia patriam
anhelavi, patriæ desiderio tactus.
Hinc omnia incommoda quæ pe-
regrinanti devorare necesse ali-
quando fuit, & pericula, quæ vel
latrones intenterunt, vel natura
minabatur, spe revidendæ patriæ
transierunt sine insigni molestia
aut suspirio. Dei beneficio, non
meo, tuta sensi vestigia, adeo res
magna est, ut Stoicus loquitur, ha-
bere imbecillitatem hominis, secu-
ritatem Dei. Incredibilis vis est
animi ad Deum erecti & constan-
tis, ad omnem fortuitum casum
retundendum. Nullum telum
in

ORATIO JUBILÆA. 5

in corpore ejus fedet; quia munitus est solidusque Dei tutela, quædam defatigat & velut levia tela laxo sinu eludit, quædam discutit, & in eos usque qui mittere conantur, respuit. Ejusdem Numinis providentiæ adscribo, quod nusquam gentium peregrinos Deos adoraverim, sed verum, quem cum lacte materno imbibi, de Deo meo sensum, fidem antiquam, in qua conscientia acquiescit, sartam, tectam retinuerim. Aliorum sacris sacrilegas manus non intuli, nec cum Syracusano Dionysio, fanum Proserpinæ spoliante, gloriari placuit, aut amicis comitibus acclamare, bonam navigationem ab ipsis
Di-

6 CASP. BARTHOLINI

Diis immortalibus sacrilegis tribui.
 Habeant sibi has delicias alii, ut fi-
 dem cum climate mutent, & incon-
 stantiæ fluctibus agitentur, quibus
 volupe Deum mutare & religio-
 nem ambulatoriam sectari, sive du-
 bia mente & desperata, sive hono-
 ribus blandientibus, sive denique
 ignotæ mulieris, ad habitum Deæ
 formatæ, specie aut astu, quæ Pisi-
 stratus olim Athenienses decepit,
 & Phya vocabatur. Neutiquam
 hanc gratiam malam pro gratia sua
 Deo gratioso rependere tas existi-
 mo, ut à quo optima in itinere su-
 scepio recepi, eidem malè dicerem
 aut obedientiam remitterem, pro-
 missam, debitam, semperque præ-
 stan-

ORATIO JUBILÆA. 7

standam. Malè animatus forem
pessimèqve meæ saluti prospice-
rem, si Diomedontis exemplo, aliis
victoriam, mihi verò damnationem
parerem. Tametsi enim debita
supplicia statim, florentibus in spe-
ciem rebus Deum suum reneganti-
um, non exsolvantur, cum lento
gradu ad vindictam sui Divina
procedat ira; tarditas tamen sup-
plicii gravitate compensabitur.

Culpam apud Vos, Auditores,
benignè deprecor, quod itineris
mei rationem exposuerim. Pri-
vata quidem sunt, publica tamen
esse volui, ut publicè Deo Sospi-
tatori vota mea exsolverem, & pa-
triæ meæ testarer, quo animo pa-
trios

8 CASP. BARTHOLINI

trios lares reliquerim, & quo eos-
dem repetierim, ut Deo & patriæ
studia & pietatem porrò consecra-
rem. Optavit ille olim patrios
revidere fumos. Mihi verò lucem
patriæ & splendorem, clarissime
per orbem refulgentem, revidere
inter prima votorum fuit. Deo sit
laus, nec votum, nec spes me fefel-
lit. Quo nomine publicè jam
Jubilæo hodie, gaudeo & patriæ
meæ dulcissimæ quanto possum
opere gratulatum veni. Magna de
patriæ Patre & Rege Augustissimo
publica apud exteros fama sparsit.
Majora illis præsentì occurrunt,
postquam pedem huc retuli. Di-
cere non possum aut verbis effari,
quan-

ORATIO JUBILÆA. 9

quantum apud alio calentes sole
populos Regia Majestas prædice-
tur, quanta admiratione justitiam,
pietatem, fortitudinem, victorias,
triumphos excipiant, quanta gen-
tis nostræ tanti Regis auspiciis sit
æstimatio, quanta gloria Cimbricæ
nationi succrescat ad avitam famam
surgenti, & fortiter pro patriæ glo-
ria pugnanti. Et quanquam non
rarò rumores minus clementes ab
invidis terrerent, cum nebula ta-
men disparuerunt, & metuendum
magis, quam metuentem Danum
confirmarunt. De quo Sclavia,
Gothiaque, terra mareque victo-
riis Danorum plenum, plenam fi-
dem fecerunt. Incredibilia spar-
C ge

IO CASP. BARTHOLINI

gebantur de Regis Augustissimi
virtute & fortuna, quæ plurimos
in suspenso habebant timidosque,
rediisse Romano Imperio fatales
hostes Cimbros Gothosque &
Langobardos, & in uno Christiano
spiritum recepisse spretam hæte-
nus & neglectam Daniam. Mihi
quidem omnia se probabant, quæ
de patria præclare Mercurius refe-
rebat, haud nescio calere etiam
num masculos civium meorum
animos & nupera obsidione exer-
citatos, nec minora miracula, quæ
revera hic patrabantur, à tanto Re-
ge expectari posse, quem justitia
armavit, pietas roboravit, fortitu-
do confirmavit, omnes Heroum
vir-

ORATIO JUBILÆA. II

virtutes obsidebant. Quibus elo-
giis passim in orbe, quem peragra-
vi, prædicatur non mentiente fa-
ma. Magna ea propter me foci-
osque voluptas subibat, contem-
plari præsentem patriam, tanto
Rege beatam, tantis victoriis illu-
strem, tantis Viris plenam, ex quo
angulo, veluti obscuro, ille Orbis
Borealis terror, Gothiæ horror, cui
olim ipsa Roma debuit, quod
capta sit & desolata, clarissima
pompa processit. Veteris incom-
modi memoriam oblitteratam vidi,
& toto animo contra injurias ac-
ceptas luctantem pugnanteque
patriam, quæ non ita pridem attra-
xit in se ruinam, cui obstandum
C 2 erat,

erat, adeoque verum esse docuit
quod sapientibus creditum tradi-
tumque, istud quod premit, quod
impendet, quod urget, si subduce-
re te coeperis, sequuturum & gra-
vius incumbere; si contra steteris
& obnitaris, repelli posse. Ath-
letæ quantum plagarum ore, quan-
tum toto corpore primo conflictu
excipiant, fusque deque habent,
omne tormentum ferentes gloriæ
cupiditate & spe victoriæ. Dani-
mei sic quoque res rationesque
suas composuerunt. Evicerunt
omnia, quorum præmium retule-
runt, non virtutem tantum & firmi-
tatem animi, sed coronam, sed pal-
mam, sed nominis sui prædicato-
rem

ORATIO JUBILÆA. 13

rem tubicinem famam, & pacem
porrò secuturam, cum non semel
in variis certaminibus debellata sit
fortuna. Non me præterit, plus-
culos Reges, Principesque princi-
patus sibi hoc in genere laudis
assignasse: sed pati debent, obsecro
si nolint, uno se Christiani Regis
præcurri exemplo, cui & ipsi, etiam
maximi, plurimum honoris de-
bent, quia beneficio illius effectum
est, ne timerent omnes, nec omni-
um præclarum opus unius super-
bia & dominandi libidine dilabe-
retur. Mira multa de Regis invicti
fortitudine & fortuna, immensa
aviditate foris audivi, sed cum Re-
gina Schebæ fateri cum admiratio-
ne

14 CASP. BARTHOLINI

ne præsens domi cogor non in-
 tus, de Salomone nostro: Verum
 est verbum illud quod audiveram
 in terra peregrina, de rebus Tuis
 & de sapientia tua, rebusque ge-
 stis: tamen non credidi verbis il-
 lis usque dum venirem, & viderent
 oculi mei: sed ecce, non indica-
 tum fuerat mihi ejus dimidium:
 superas sapientia & bonitate & for-
 titudine illam quam audiveram.
 Beati homines tui, beati servi tui
 isti, qui stantes coram Te jugiter
 audiunt sapientiam tuam. Beati
 quoque milites, qui sub tanti Du-
 cis vexillis militant, Teque prae-
 untem sequuntur forti animo & fi-
 deli, ut victoriis Tuis intersint. Sit
 Je=

ORATIO JUBILÆA. 15

Jehova Deus tuus benedictus, qui delectatus est Te, ut collocaret te in folio patrio, eo quod diligit Jehovah populum suum in seculum. Ideo imposuit Te Regem, ut exercereres judicium & justitiam, & vindicareas Daniam Tuam oppressam, vicinorum injuriis. Cœterum, in eo paria facere non possum cum Regina, ut aurum, aromata & pretiosos lapides offeram: Neque enim id sinunt facultates meæ, qui aureum vellus colchide non inveni, sed vellus purum, membranamque, qua inscribantur patriæ & Regis laudes, qua consignentur ea quæ in Arte nostra vel invenerunt alii, vel mihi ad Naturæ sacra admisso patuerunt.

erunt. Siquidem igitur aurum non habeo, quod obtulit illa, succedaneum animum substituam, supplicationes pro incolumitate Augusti nostri, fortis, iusti, invicti, & subjectissimum obsequium tanto Principi, qui parem non habet, nuncupabo. Rerum maximarum pretium, in ipsis est, virtusque magnifica nec lucro invitatur, nec absterretur damno, sed contra se publico impendit, & calcatis donis se periculis subicit, ut si quid obvenit commodi, inter accessiones alii numerent. Nobis patriæque pro lucro reputamus Augusti victorias, triumphos, pericula in felicissimis expeditionibus suscepta,

pta,

pta, & grato animo agnoscimus
beneficia populo Danorum col-
lata & famæ immaculatæ redinte-
grationem. Diffundant se eru-
ditorum lingvæ & pennæ in Regis
Augustissimi laudes, & priorum,
annorum res gestas describant, qui
majori eloquentia pollent. Ego
temperare mihi non possum, cui
festo hoc Jubilæo dicendi partes
demandatæ sunt, quin brevissimè
percurram, & grato devotoque ac
lætitiæ pleno animo, recolam anni
hujus, quem jam terimus, histori-
am Regisque inclyti expeditiones,
& patriæ felicitatem, ut hoc, cum
eodem anno seculi prioris, cujus
pariter res memoria dignas stri-
D Etim

Etiam recensebo, Ecclesiæque & patriæ statum exponam, collato, innotescat Orbi, quam justam habeat Academia patria causam, ut Jubilæa oratione celebretur secularis hic annus, præfensque in exemplum lætitiæ ab omnibus, qui patriam amant, qui Regis Augusti merita æstimant, solenniter colatur, justiore verò, si alteri hanc spartam commisisset. At quandoquidem ita visum Patribus Academiæ, ut mihi nuper reduci, postquam vix pœnulam deposuerim, Oratoris partes demandarentur, meique officii sit, tantorum Virorum, quos ex merito veneror, voluntati parere, certior ero de illo

lo=

ORATIO JUBILÆA. 19

lorum favore, &, si illis placuero,
de omnium applausu. Favete,
Auditores, balbutienti Oratori, &
si Orator se minus dicendo com-
mendaverit, materiæ tamen, quam
proponet, dignitate gratus erit, &
diei solennitate probatus.

Imitabor verò mores peregrin-
antium, quorum recens est mihi
memoria, qui aliena in itinere prius
sectantur & curiosis oculis lustrant,
quam quæ in patria post se relique-
re. Nec minus mihi curæ erit
pictores sequi, qui artis suæ daturi
specimina, in Deorum imaginibus,
illorumque fabulis penicillum fa-
tigant, domesticarum rerum
negligentes. Certus tamen sum.

D 2

&

20 CASP. BARTHOLINI

& vos, Auditores, securos esse jubeo, si peregrina, quæ alibi anno seculari nostroque præsentī gesta & acta, proposuero atque cum patriæ rebus conferantur, minora fore & viliora quam ut principem locum à nobis mereantur. Videbitis enim Ecclesiam hic pacatiorē, Rempublicam florentem, magis & rebus præclaris illustriorem. Ne patriæ amore occæcatus videar, advocabo peregrinæ Germanorum Gallorumque Ecclesiæ turbas, ut in quieto patriæ Ecclesiæ statu tandem requiescam & Júbila canam.

Dolendum sanè dissidia Ecclesiarum nec ibi nec illic desuisse anno
septu

septuagesimo septimo seculi præ-
 cedentis, nec in unum coalescere
 potuisse corpus, quod unum caput
 agnovit, Jesum Christum. Nun-
 quamne ergo Christianus Orbis
 quietus erit? Semperne in cæde &
 sanguine versabuntur Christi Ser-
 vatoris sanguine redempti, & tam
 preciosum ^{λύτρον} variis dissidentium
 opinionibus in prædam cedit? Er-
 gone Christianismus se habet in-
 star Chamæleontis aut versatilis
 cothurni, ut tot sint religionis for-
 mæ fingendæ, quot capita illorum,
 qui variis opinionibus quasi soluti
 legibus dominantur, & stultitiam
 suam sapientiæ larva tectam mun-
 do propinant, nescio quibus Cir-
 cæis

cæis poculis fascinati. Aliter sentire deberent, qui Christo nomen dederunt, ne eadem illis instrumenta litium, convitiōrum, dissidiorum & schismatum fierent, quæ salutis esse debebant. Ita quieta piorum felicitas turbatur, tranquillitas evertitur, & amittitur veri Numinis cultus secura possessio. Litigant aliqui de nomine, alii nimia religione ex musca elephantum faciunt, & neminem admittunt probantque, nisi iisdem sensibus ritibusque emancipatum. Ingens controversia vocabuli *Abstracti* Heshusio usitati Borussia turbavit, & quanquam mentem suam Heshusius candidè explicaret, benigneque
a The

a Theologis aliis Germaniæ interpretatio nominis exciperetur, impetrare tamen gratiam scriptæ semel vocis à Wigando Collega non potuit, quin loco moveretur & Episcopatum Sambiensem amitteret, quia publicè revocare sententiam renuebat, nullius sibi erroris conscius, quanquam locutionum minus circumspectarum & incommodarum, quæ præter voluntatem animo minus attento exciderant, correctionem promitteret, & ad quorumvis candidorum in Germania Theologorum censuram provocaret. Uterque erravit, quantum ego quidem perspicio, hic nimio rigore & in fratrem

trem odio, ille facilitate odiosæ & controversæ vocis, & animi obstinati perseverantia. Neutrum Theologo dignum, qui & lapsus condonare debet, & scrupulosas locutiones sponte monitusque emendare, ut publicum scandalum evitetur. Adeo difficiles sunt mortales in condonando, prompti facilesque in carpendo, & alii fortunis suis malunt excidere, quam errores revocare, etiam in syllaba commissos. Melius Wigandus conscientiae suæ consulisset, & Heshusius quieti, si quam de voce abstracti sitem sibi moverant, ab odio & obstinatione abstracti, fraterna concordia sopire in animum Christianum

stianum induxissent. Adeo serio
Orbi Christiano dolendum, restau-
rata Christianismi tempora ex mi-
nimis quandoque proximum fla-
gellare, cum ubique ostentetur
multum scientiæ, conscientiæ pa-
rum. Litium ferax est seculum,
sed pietatis sterile. O utinam se-
positis vocum litigiis, pietati magis
studeremus, quam ostentationi, fu-
gientemque terris pietatem &
amorem retraheremus. Erudire
præstat moribus Christianis, quàm
morbis animi, qui lædunt illum
quem occuparunt, & alios velut
fascino inficiunt. Alia via in religi-
onis negotio qui grassantur, nihil
profectò aliud faciunt, quam De-
E um

um docent quomodo ipsos debe-
at verbo damnare. Quid prode-
rit de Deo, de Operibus ejus, de
Christi majestate & salutari myste-
rio, sacramento, alto disputationis
fervore immergi, si pietate desti-
tuti displiceamus Christo? Non in
verbis tantum sed factis consistit sa-
lus religionis, cujus summa est, imi-
tari Christum mansuetudine, quem
colimus fide. Male vivitur, ubi
de Deo non bene creditur: sed
inutiliter quoque creditur, ubi non
bene vivitur. Vera fides non est
interius, ubi opera non apparent
exterius: Christiani enim non
sunt, qui non dignam Christiano
vitam agunt.

Dum

Dum de voce ferram contro-
versia ducunt Borussi, de re ipsa
Galli decernere instituerunt, in-
dictis Blæsensibus Comitibus, quibus
decretum factum de una religione
in Gallia retinenda contra datam
aliis Protestantibus fidem & libe-
ram exercenda in regno religionis
potestatem, salva tamen manente
Protestantium vita & bonis salvis,
qui domi manerent. Iniquum
visum edictum, & contra concessas
à Rege non ita pridem immunita-
tes, pacemque publicam. Hinc
delegati ab ordinibus expediuntur
ad Navarrum, Condæum & Anvil-
lium, alii ad Germaniæ Palatinos, ut
propositæ conclusionis justitia fi-

E 2

ne

ne magnis turbis approbaretur. Ipse Rex Galliæ minime ignarus malorum, quæ revocato edicto & accenso semel bello secutura essent, præcipuorum Consiliariorum sententias exquisivit, qui quidem majorem propriæ utilitatis rationem habuerunt, quam regiæ authoritatis regniqve quieti. Ordinum enim petitionem, ut jam concessam, miris laudibus extollebant, & de ratione belli gerendi discebant. Prudentissimus ille, quod consilia aliorum præterret suo, & aliena sapientia uteretur, ne suam suspectam populo orbique redderet. At diversum fuit aliorum de hoc concilio judicium, & motus

tus animorum prorsus diversus, qui memoriam in ea, quæ maximè expediebant publico, spargebant. Navarræus enim, ad quem Vienneſis Archiepiſcopus miſſus fuerat, & ipſum nomine Ordinum, ad comitia invitaverat, ad conſtituendam religionis unitatem adhortatum, prudenter ſuaſit, providendum illiſeſſe, ne quod à Rege peterent, ut una tantum religio in regno Galliæ toleretur, eorum deſiderio minus reſpondeat, & quam periculofum ſit aſſerere, Regem fide Proteſtantiſus data non obligari, nam inde effectum iri ut aliquando pacis firmandæ rationes etiam à volentibus maxime, expediri

diri ne utiqvam possint. Nec aliter respondit Anvillius, à Legatis Monspeffuli deprehensus; vereri enim se ne intempestivo remedio malum potius irritetur, qvam sanetur: proinde etiam atqve etiam orare ut eas causas pro prudentia sua examinent & maturè in commune consulant: tot præteritarum calamitatum documento constare ostendens, religionem à Deo inspirari, ab hominibus imperari non posse: Proinde se, qui cum omnibus bonis ad calamitatum præteritarum recentem adhuc sensum cohorrescat, non posse non commoveri, cum audiat rem toties infelicitè tentatam tunc denuo retrahere;

ORATIO JUBILÆA. 31

etari; nam post ultimum edictum
cunctis constituisse, ad pacem in
regno tuendam duas religiones
commodè tolerari posse, nec pro-
inde nisi periculoso exitu fidem
edictis datam revocari. Nihil tem-
poribus illis accommodatius pro-
ferri potuit, nihil in omni republi-
ca conservanda utilius. Nisi enim
Princeps datam semel fidem ser-
vet, & jusjurandum sanctum ha-
beat, perit quoque subjectorum
fides, & obedientia, quam in nego-
tio religionis maximè exposcunt
devoti civium animi, qui ad aras
dominis suis obstricti censentur.
Unio inter principem & subjectos
nulla re magis quam fide coalescit,
qua

qua magnus fit ille, hì securi degunt, si securi sint à proprio domino. Benè Q. Marcius olim ad Persem Regem, favere pietati fideique Deos, per quæ populus Romanus ad tantum fastigii venerat. Agefilai Spartani Regis exemplo & dicto liquet, quantum precii sit statuendum fidei datæ. Cum enim is exercitum in Asiam trajecisset contra Regem Persarum; Tissaphernes summus satrapa imparem se viribus videns, & celeritate præventum, fallere per speciem fidei quæsit. Itaque de induciis cum Agefilao egit, obtinuitque trimestres, quas ipse quidem Agefilaus optima fide servavit, sed alter bel-

bellum summa vi comparavit.
Qvod ubi Agefilaus sensit, nihil
exinde tertur turbatus, imo mul-
tum ex eo sibi lucri promanasse di-
cebat, qvod Tiffaphernes suo per-
jurio & homines alienaret & Deos
redderet iratos: utrumqve in se
aliter esse, qvod & milites fidenti-
ores redderentur, Deorum ope
fisi, & homines amiciores, qui iis
fere studerent, qvos conservare
fidem viderent. Dominorum
fides erga servos pari passu ambu-
lat, ut, qvod illi non præstant his, hi
illis servare nolint. Hinc laudem
meretur Centurio ille Cæsaris, qui
captus in mari Africo, militare Sci-
pioni, aut sacramentum Cæsarida-
tum

F

tum

34 CASP. BARTHOLINI

tum mutare, nec minis nec precibus adduci potuit: pro summo quidem beneficio Scipioni gratias egit, qui vitam offerret belli jure capto, sed illi beneficio quia scelus conjunctum esset, non utebatur, neque enim fidem hoc permittere neque virtutem. Non plebeia hæc virtus est, sed regia maximè, & Regibus propria esse debet, qui proximè ad Deum fidei tenacem accedunt. Hinc regia prorsus fuit Francisci Regis, qui Henricum præcessit, clausula in conventu Procerum celebri, cum exprobraretur illi fides Carolo Quinto servata: etiamsi, inquit, fides toto Orbe exfularet, tamen Regibus tenendam

dam esse, qui ea sola, & nullo metu,
cogi adstringique possent. Mirum
vero religionem intercedere &
prætendi, ut fides publicè data vi-
oletur, cum illa id unicum urgeat,
ut fide in Deum & charitate in pro-
ximum constantes simus. Pagano
fidem servandam quis negaverit?
Bone Deus! deteriorene erit con-
ditio hominis Christiani, quan-
quam ab alio in nonnullis diversum
sentiat. Majoris incommodi vi-
tandi causa duas religiones tolerari
posse, multis & rationibus & exem-
plis demonstrarunt Galli Prote-
stantes, quibus quid opponi pote-
rit non video, nec viderunt Reges
ipsi, qui id ad hunc diem permise-
runt,

runt, sicut & in Imperio Germanico Carolus Quintus, & qui illum in folio sequuti sunt Imperatores idem necessariò concesserunt. Oculos ad florentissimum Belgium foederatum reflectite, ut variarum religionum miscela ostendat, non turbari Rempubiicam, sed augeri & ad maximum vigorem efflorescere. Vivunt religione diversi, non animo, non voluntate in commune bonum consulendi, & quod deliquium passa est respublica, non ex Religionum diversitate ortum, quæ amicè inter se conspirant, sed potentissimi hostis insultu. Expendite Otthomannorum potentiam, quæ multitudine religionum, quæ libe-

liberæ permittuntur, caput effert
in Orbe. Polonorum eadem
prudencia est, ut tolerant eos, quos
sine Reipublicæ ruina expellere,
non audent. Monentibus tamen
Politicis aurem præbere convenit,
qui non facile in Republica bene
constituta immutandum aliquid
concedunt, sed si vigeat una religi-
onis confessio, eam servandam, si
pluribus assueverunt cives, non
turbandos, si ipsos se non turbent,
aut publicum commodum inter-
vertant. De his tamen plura ver-
ba non faciam, nec in re tam seria
judicium mihi sumam, ne mihi ob-
jiciatur, quod Photæ Rhetori
contra Alexandrum Magnum per-
oranti

oranti objectum fuit : aude-
ne juvenis de tam magnis rebus
loqui. Audiamus potius Princi-
pum in Germania responsum lega-
tis Gallorum datum circa hoc ne-
gocium religionis, cujus in gratiam
Blæsis comitia celebrata sunt: Ger-
maniam scilicet cum non nisi edicto
de pace religionis à Ferdinando
Cæsare constituto, à tot belli cala-
mitatibus & vastitatibus requiesce-
re potuerit, documento Regi Gal-
liæ esse debere, si pacem habere
velit idem ut in suo regno faciat,
alioquin turbas in regno nunquam
defuturas: Periculosissimum au-
tem esse, quod Rex, cujus officium
est instar boni Patrisfamilias, omnes
suos

suos cives æquali jure complecti,
scisso factionibus regno, oblitus
fidei datæ, alteri parti se præbeat:
Non satis esse quod Rex Prote-
stantibus conscientiarum liberta-
tem relinquere velit, adempta ta-
men libera ac publica religionis
suæ professione, nam perinde face-
re, ac iis quibus vitam salvam pro-
misisset, postea ad victum necessa-
ria denegare. Ita quidem rectè
moderatorum consiliorum aman-
tes Germani Principes censuerunt,
& hoc nomine laudandi, quod ami-
corum Christianorum in Gallia pe-
riclitantium causam egerint. Id
enim charitate ducti facere tene-
bantur, ut consilio quocunque, &
fi

si opus, auxilio, laborantibus subvenirent, & ad fidem quietemque Gallum hortarentur, ne malum ibi exortum ad se malo contagio propagaretur.

Singulare circa hæc tempora eorundem Principum Germaniæ & Theologorum fuit concordiæ studium. Quo omnes curas cogitationesque converterunt, ut recepta approbataque fidei Augustanæ confessio, immutata permaneret. Natus hinc Liber, quem Formulam Concordiæ vocarunt, multorum ore scriptoque celebratus, à Wurtembergicis Theologis primum conceptus, innox ab Augusto Electore in Conventu Torgensi

genſi ſecundo Theologorum
Brunſvicenſium, Megapolitano-
rum & Wurtembergicorum ope
confirmatus, demum juffu ejusdem
Electoris in cœnobium Bergenſe
prope Magdeburgum convocatis
ſex Theologis, Jacobo Andreae,
Selneccero, Cornero, Chemnitio,
Chytræo, Muſculo, ultima manu
completus, & tandem in Colloquio
Herzbergenſi, Jeverenſi, Sanger-
huſano, à plerisque ſubſcriptus. Ju-
dicia quidem diverſa expertus eſt
iſte conatus, ſed ſancto concordia
titulo laudatus cum autoribus, qui
placido ſpiritu animati ad concor-
diam ſepoſitis rixis flectere tenta-
runt Doctores in communi Evan-
gelii

G

gelii

gelii luce. Cum vero plerique in Germania emendationis doctrinæ præcones autoritate Principum suorum subscripsissent, Ecclesiæ Daniæ, itemque per Germaniam non paucæ, aut litium immunes, quibus sopiendis concordia quærebatur, aut sola in Augustana Confessione acquiescentes subscribere detrectarunt, à dogmatis tamen formula illa comprehensis neutiqvam alienæ. Maluerunt, quippe in patria nostra Theologi, concordii animo & fide vivere, quam de concordia multa scribere. Quis non miretur illorum prudentiam placidamque mentem, qui semel agnitæ veritati placidè acquiescere

cere malunt, quam vel novas lites
fovere, vel concordia novæ sub-
scribere, ne ullam de se discordia
suspicionem Orbi præbeant, nam
si in pace & concordia renovanda
solia contulissent consilia nostri,
etiam dissidiorum ante viderentur
fuisse participes. Excusant alii
Dania Regem Theologorumque
Danorum ad subscribendam for-
mulam Concordia tergiversatio-
nem, quod ipsis tunc ad subscriben-
dum transmissus non fuerit, utpote
quia Germani hunc sibi præfixum
habebant scopum, ut aliquorum
doctrinæ, à recepta alienæ, variis
artibus & technis irrumpenti in
Germaniam resisteretur. Hinc Re-

gis Daniae subscriptionem omitti absque praedjudicio potuisse, cum aliis mediis suo regno in fidei susceptae unionem prospicere valuerit. Vera causa, nisi fallor, ista fuit, quod immiscere se rei ad se non pertinenti Dania noluerit. Quia res erat ipsis Danis religio, quam disputationibus novisque formulis inquietare ex usu publico non putarunt nostri. Semper enim suis rebus bonisque gaudere solent, nec facile ad alia digrediuntur, si sui boni possessione frui liceat. Concordia animis illorum inscripta, non libris, non peregrinis formulis, quae saepe pro cuiusque turbulenti cerebro varias figuras induunt,

unt, & publicum è statu tranquillo detrudunt.

Dania illa est mea, quam hoc nomine laudo, quod inter dissidentium Gallorum Germanorumque concertationes domi suæ secum habitat, in Deo suo acquiescens. Fridericus Secundus, rerum tum potitus, pacis amore præluxit, & de æternitate quieta cogitans orbi reliquit familiæ æternitatem. Enimverò ea fuit anni hujus secularis felicitas, nullis fastis silentio prætereunda, ut Orbi Patriæque nascere-
tur Christianus, nomine Quartus, re immortalis, ad cujus memoriam obstupescit animus, torpet calamus, deficiunt vires Orationis successe-

sceptæ, & silentium cogitanti obrepit, quem Annales loqvuntur. res gestæ æternitati consecrant, patria veneratur, orbis admiratur. De quo præstat tacere quam pauca loqui, cum tantus fuerit ut penna mea exili capi non possit, etsi non tam fortunam fenserit ubique propiti- am, quam virtutem animique magnitudinem ubique habuerit verè Regiam, & supra mortales alios eminentissimam; tamen infra se fortunam sprexit, virtute, pietate, iustitia, & fortitudine involutus, quam ad gloriosos canos servavit, & ad posteritatem nostram meritis illius obstrictam propagavit. Tanti Borealis Orbis Herois Nativitas
ex-

ORATIO JUBILÆA. 47

exoptatissima annum hunc prioris
seculi nobilitavit & illustrissimum
reddidit, quæ hodierni Jubilæi ar-
gumentum foret, nisi alia præoc-
cupassent calamum Oratoris vestri.
Sola tamen digna est, quam læto
animo & memoria devota hodie
recolamus, quod ex hac luce Rex
immortalis Daniæ gloriosos annos
orsus sit. Augusti olim natalem
Equites Romanos sponte atque
consensu, biduo semper celebraſſe,
Romanorum Historici tradunt.
Quidni nos non jussi aut rogati, Di-
vi Christiani Quarti natalem cele-
bremus, qui Augusto ævari omni
jure potest, late imperans & ad In-
diam usque protendens regios
fas

48 CASP. BARTHOLINI

fasces, bello & pace magnus: Hoc
namqve intermissum nunquam fuit
apud Romanos, rerum dominos,
nisi ignominiae causa. Hinc Ti-
berius Agrippinam criminofissimè
infectatus diem ejus natalem inter
nefastos referendum suavit. Non
tam ingrati esse volumus in Regem
tam præclare de Patria & Ecclesia
meritum, sit potius Regis tanti, ut

Cæsaris alma dies & luce sacrati-
or illa,

Conscia Dicteum quæ tulit Ida
Jovem.

Lucet hodieque velut in orbe
suo, Christiani Divi fidus, & nos
oblivionis reos perageret, si omissa
Natalis hujus celebritate sileremus.

Ca=

ORATIO JUBILÆA. 49

Caligula olim Consulibus oblitis de
Natali suo edicere, abrogavit ma-
gistratum, fuitque per triduum sine
summa potestate Respublica. Ne
nobis exprobraret eandem ignaviam
vel oblivionem Divus Christianus,
dicavimus illius meritis natalem
hunc secularem annum, non mag-
no apparatu antea insolito, non
editis tota urbe vicatim gladiatorii-
bus, non exstructis in campo Mar-
tio aris, lætis foedissimo cuique,
apud bonos invidiosis, quemad-
modum natalem Vitellii Cæcina ac
Valens celebravere, non victimis
publicè cæsis crematisque, non lu-
dis Circensibus aut venatione, sicut
Augusti natalem Julius Augusti fi-
lius

50 CASP. BARTHOLINI

lius, tum Prætor, celebravit, non
epulis in Capitolio hoc nostro: sed
æterno chartarum monumento,
quo quicquid ex Christiano ama-
vimus, quicquid miratus est Orbis,
manebit, permanfurumque est in
animis Danorum, in æternitate
temporum omnium.

Dolendum verò felicem hunc
Christiani Regis nascendi annum
sine cæde & sanguine transire non
posse. Abstinebant quippe vete-
res nonnulli in Nativitate Minervæ
celebranda sanguine & ferro. Non
tamen exemplo priorum caret na-
talis cruentus. Ita Phyllide ad Na-
talem Mæcenatis celebrandum à
Flacco invitata, ara castis vincita
ver-

ORATIO JUBILÆA. 51

benis avebat immolato spargier
agno: & cum Alexander Severus
natalem diem commendaret, ho-
stia cruenta effugisse narratur, &
ut permixtus populo erat, albam
ejus vestem, cum qua constiterat,
cruentasse. Deo sint gratiæ, quod
Minerva nostra natalem Christiani
Quarti annum sine cæde recolat,
quanquam vicinia omnis cruore
humano madeat. Beneficium hoc
omne Nepoti tuo, Dive Christiane,
referimus acceptum, quem in solio
tuo Regio sedentem hodieque ve-
neramur, æterna laude florentem,
virtutisque tuæ gloriæque similli-
mum Regem, sed fortuna mayo-
rem. Viderunt majores nostri

H 2

cu

cunas Tuas anno hoc seculari, & vagientem in illis Herculem: at masculum adultæ ætatis & fortitudinis robur Nepos Tuus Christianus Quintus, hoc, quem decurrimus, anno, patriæ suæ & Orbi universo ostendit, hostibus formidandus, Daniæ salutaris. Hinc ingens Jubilæi nostri splendor nascitur, quo ad animum revoçamus, quæ Dei Omnipotentis auxilio, virtute & fortitudine sua Augustus hic noster, quem nobis Divina providentia & benignitas concessit, præclara gessit, annalibus celebranda. Non patitur angusti temporis mensura, mihi concessa ad dicendum, ut altius hic repetam priorum annorum

rum

ORATIO JUBILÆA. 53

rum expeditiones tanta felicitate
coeptas & peractas, ut nemo mor-
taliū inventus sit, nisi invidiæ
oestro percitus, qui non obstupu-
erit ad Regium Christiani Qvinti
nomen. Non dispari faciē fortu-
na Christiani Augusti, hujus anni
decursum beavit, quam in lætitiæ
hodiernæ augmentum brevissimè
commemorabo, grata in Deum &
Regem memoria, læto finiti itine-
ris condimento, & illustrissimo
Orationis ad exitum properantis
ornamento.

Qvamprimum se finita hyeme
Scaniæ iterum exercitu benè in-
structo intudisset patriæ vindex
Christianus, adventu suo terruit
ho-

hostem & retrocedere coëgit, qvi
libera hyberna per Scaniæ provin-
cias habuerat, & Urbem munitissi-
mam Christiano-stadium obsidio-
ne diuturna constrinxerat, quæ ho-
stis minas intrepidè perpeffa, Re-
gis sui adventu, metu liberata fuit &
obsidione. Hinc recollectis vi-
ribus recurrens hostis, varia tenta-
re videbatur, sed irritò conatu, nec
impedire potuit Malmogiæ op-
pugnationem, quæ demum à no-
stris sponte & deliberato consilio
soluta, cum fefellissent pontes &
hosti propinquo esset obviam eun-
dum, proelio cruento inter se com-
missi exercitus æquo Marte disces-
serunt, Danis hostium multitudi-
nem

ORATIO JUBILÆA. 55

nem animo æquantibus, & Christiano Rege tam Ducis quam militis partibus fortissime defungente. Interea duplici prælio navali superior Danus, classe hostium formidanda & quæ ruinam Daniæ minata fuerat, profligatâ, captâ, dissipatâ, Mare Balthicum sibi asseruit, & Provincias omni metu liberavit, quamque perniciem igne & ferro destinaverat hostis nostris oris maritimis, convertit Deus per fortunam Regis in hostium viscera: Victrix enim classis Danica littora Svecorum invasit, Oelandiam vastavit, cum pacisci de tributo noller, Calmariae campos infestavit, multos mortales cum pecore atque alia

alia præda cepit, ædificia splendida incendit, multa loca hostiliter accessit, & injurias suas manu intrepida vindicavit, jure suo & belli usa. Nec segnior fuit in Norwegia Christiani Regis fortuna, & per Gyldenlovium anni felicitas. Bis enim profligatus in Gothiæ finibus hostis insigni clade, Marestrandium inaccessum viriliter expugnatum, Jemtia recuperata, omnia cœtera ex voto succedere. Nupera in Rugiam expeditio victoriis hujus anni complementum addidit, vel hoc nomine clarissima, quod Regem incolumem, inter tanta pericula tempestatis, ad urbem suam plenum triumphis reduxerit.

Ple=

ORATIO JUBILÆA. 57

Plenus annus victoriis trium-
phisque Regem saluum lauroque
illustrissimum sibi gratulatur, & pa-
tria inter summa reputat, Regem
talem videre, quem fortuna fama-
que omnium oculis exposuere.
Agnoscite mecum, Auditores, anni
hujus Jubilæi splendorem, & læti
vota multiplycate, quod aucta sit
patriæ gloria, familia Augusta nata
Principe creverit, Rex innumeris
triumphis redux, patriam pietate &
justitia regat, cives concordēs pro
Deo & Rege pugnare parati sint, &
antiquum Cimbrorum decus sibi
asserere. Ego, quanquam privatas
luctendi causas habeam morte Avia
meæ desideratissimæ, cujus octua-
gesima

I

gesima

58 CASP. BARTHOLINI

gesimum quartum annum agentis
funus hisce diebus defleo, pullatus
& moerore lassus: publica tamen
felicitate excitatus, gaudeo quanto
debet bonum civem opere, quod
omnia salva nobis hactenus con-
servaverit immensae bonitatis De-
us, Regem Augustissimum clemen-
tem, Mæcenates benignos, Patres
Academiae salvos, cives pios & for-
tes, utramque Rempublicam inco-
lumem, patriam denique floren-
tem & ad invidiam usque celebra-
rimam. Augetur publica mea læti-
tia, quod Academia hæc regia, cujus
partem me gratus agnosco, Recto-
rem habeat Wormium, Patre mag-
no Majorem filium, Professores
Am-


ORATIO JUBILÆA. 59


Amplissimos, ex quorum sapientia
& doctrina tantum proficiamus,
quantum æstimari non potest, in-
terque eos Parentem meum hono-
randum in senio adhuc florentem,
& publico suisque superstitem. Ul-
tra mortale gaudium æstimo, quod
Ecclesia nostra cum Doctoribus
reverendis sine discordiis, sine con-
certationibus, sine schismatis, con-
cerdi animo piaque mente Deo li-
tet, & quam concordiam anno se-
culari amaverat, eandem hodieque
Dei gratia conservet. Det Deus
porrò Regi Augustissimo vitam,
victorias, triumphos: Magno Regis
Cancellario & Patrono Academiae
Illustrissimo Comiti Friderico ab
Ah-


60 C. BARTH. ORATIO JUBILÆA.

Ahlefeld felicitatem optatam: Academia Patribus salutem meritam, civibus vota sua, omnibus bonorum perpetuitatem, mihi denique, qui ad docendum in Academia majorum Auctoritate accingor, & bono omine, fausto lætoque hoc festo cœpi esse disertus, singulorum favorem, amorem, ut quo me Præceptorum doctrina, Patris exemplum & Avi, genius non invitus, propria industria & labor publico addictus vocaverit, Deo conatibus benedicente, felici pede progrediar in Dei Optimi maximi honorem, patriæ Academiae Orbisque literati commodum, Artis nostræ famam & existimationem. Voto vestro me sublevate, applausu dignemini, mecum Pæana canentes.

D I X I.







005643628

